

SURAT KELILING JABATAN PERDANA MENTERI BIL: 5/1998

NEGARA BRUNEI DARUSSALAM

**ANUGERAH CEMERLANG PERKHIDMATAN AWAM
NEGARA BRUNEI DARUSSALAM**

Sukacita dimaklumkan bahawa pencalonan untuk Anugerah Cemerlang Perkhidmatan Awam bagi tahun 1998 adalah dengan ini dibuka kepada semua pegawai dan kakitangan atau kumpulan dalam Perkhidmatan Awam Negara Brunei Darussalam iaitu **tidak termasuk** Angkatan Bersenjata Diraja Brunei, Pasukan Polis Diraja Brunei dan Unit Simpanan Gurkha.

2. Semua pencalonan untuk Anugerah Cemerlang Perkhidmatan Awam hendaklah terdiri dari projek-projek/program-program yang telah diperkenalkan dalam tempoh tidak melebihi daripada tiga tahun dari tarikh pencalonan dan telah dilaksanakan sekurang-kurangnya enam bulan dari tarikh pencalonan dihadapkan serta telah menunjukkan hasil-hasil atau faedah-faedah yang positif.


3. Sepertimana di tahun-tahun yang lalu, pencalonan untuk Anugerah Cemerlang Perkhidmatan Awam bagi tahun 1998 adalah terbuka dalam 2 kategori seperti berikut:

i. ***Penyampaian Perkhidmatan***

Projek-projek/program-program dibawah kategori ini adalah merupakan usaha-usaha penambahbaikan dan pembaharuan kearah meningkatkan kualiti penyampaian perkhidmatan kepada orang ramai dan peningkatan prestasi organisasi. Dalam penyampaian perkhidmatan ini, faedah-faedah kewangan bukanlah merupakan faktor utama tetapi lebih menumpukan kepada usaha-usaha penambahbaikan seperti perkhidmatan-perkhidmatan kaunter (*counter services*) dan mana-mana perkhidmatan yang berasaskan pelanggan/klien.

ii. ***Kewangan***

Projek-projek/program-program yang dibawah kategori ini adalah merupakan usaha-usaha penambahbaikan dan pembaharuan yang lebih menumpukan perhatian kepada kewangan yangmana mengutamakan kepada hasil/kesan yang mengambilkira pulangan/faedah dalam bentuk kewangan seperti penjimatan kos; peningkatan pendapatan/hasil; keberkesanan kos; dan "*value for money*".



4. Pembahagian kategori ini adalah bertujuan untuk melicinkan lagi proses penilaian dan pemilihan bagi penerima Anugerah Cemerlang Perkhidmatan Awam dari kalangan projek-projek yang dicalonkan dibawah dua kategori berkenaan, iaitu dengan berdasarkan kepada pencapaian markah yang paling tinggi menurut kriteria-kriteria, cara dan asas pemilihan/perkiraan yang telah ditetapkan.

5. Setiap kementerian hanya dibenarkan untuk mencalonkan tidak lebih dari 3 projek/program yang paling cemerlang bagi setiap kategori. Setiap pencalonan adalah dibuat dengan mengisikan borang A, B1/B2 dan C yang boleh didapati di Jabatan Perkhidmatan Pengurusan, Jabatan Perdana Menteri selaku Urusetia kepada Jawatankuasa Pembaharuan Perkhidmatan Awam. Borang tersebut hendaklah dikembalikan kepada Jabatan berkenaan **tidak lewat dari 30hb April 1998** melalui kementerian masing-masing. Pencalonan yang lewat diterima tidak akan dilayan tetapi boleh dihadapkan semula pada tahun berikutnya.

6. Setiausaha-setiausaha Tetap dan Ketua-ketua Jabatan yang menghadapi sokongan bagi pencalonan Anugerah ini hendaklah memastikan supaya setiap projek/program yang dicalonkan itu selaras dengan matlamat Anugerah Cemerlang Perkhidmatan Awam untuk meningkatkan prestasi, kualiti dan produktiviti dalam Perkhidmatan Awam Negara Brunei Darussalam serta menepati kehendak garispandu penyertaan berkenaan.

7. Panel Penilaian dan Pemilihan bagi Anugerah Cemerlang Perkhidmatan Awam yang akan dilantik mempunyai kuasa untuk menolak pencalonan yang tidak memenuhi syarat penyertaan dan mana-mana projek/program yang bidang tumpuannya tidak menepati matlamat Anugerah ini.

8. Penerangan dan maklumat lanjut mengenai Anugerah ini boleh diperolehi dengan berhubung terus kepada Jabatan Perkhidmatan Pengurusan yang beralamat seperti berikut:-

**Jabatan Perkhidmatan Pengurusan
Jabatan Perdana Menteri
Jalan Menteri Besar
Bandar Seri Begawan BB3910
Negara Brunei Darussalam**

Telefon No: 382066/65/64.

[AWANG HAJI HAZAIR BIN HAJI ABDULLAH]

**Setiausaha Tetap
Jabatan Perdana Menteri
NEGARA BRUNEI DARUSSALAM**

**Jabatan Perdana Menteri
Istana Nurul Iman
Bandar Seri Begawan BA2110
NEGARA BRUNEI DARUSSALAM**

Rujukan : [[5]JPM/SK/1998

**Tarikh : 20 Januari 1998
21 Ramadhan 1418**